

Maafkan Aku

maafkan aku kawan
sebab lambat hadir
majlis jamuan makan
kenduri lahir
aku kurang perasan
waktu semakin hampir
sebab sibuk melayan
anak kucing ke hulu hilir
golek-loncat riang sakan
bikin senyum terukir
aku betul janji ini saluran
Youtube yang terakhir

maafkan aku teman
aku lupa menjawab salam
sebab bergambar kiri kanan
pagi petang siang malam
busana terkini dan juadah makan
setapak langkah mesti dirakam
takut tulat tubin lupa ingatan
entah abu yang digenggam
tunggu dulu teman
sebelum aku habiskan salam
izinkan aku muat naikkan
hidup-matiku ke *Instagram*

maafkan aku rakan
aku tak sempat bertepuk
menyambut kegirangan
pangkatmu naik tanduk
mungkin aku kalis kekuasaan
atau betul sedang sibuk
sibuk mencetus pertikaian
dengan hadis mauduk
aku pemangkin kelalaian
dengan jenaka lapuk
aku beribu ikutan
raja dalam *Facebook*

maafkan aku taulan
sekiranya aku buat kacau
aku tak pandai berspontani
hanya bijak berkicau
bak murai bertenggek di dahan
siapa yang hirau
aku bukan ayam jantan
serak berkokok garau
aku bawa perkhabaran
namun kau tak perlu risau
dunia *Twitter* cuma cetusan
kata-kata sasau

Semut Bukan Pengikut

meskipun tak seindah alhambra
bekas tukul pahat andalusia
atau kolosium rumawi purba
tumpah darah diiring sorak ria
namun istana kami tajmahal kita
kubah kerikil dicungkil sama
pangsa digali empunya berjuta
istilah daulat ratuku dijunjung mulia
ini teratak tempat cucuk berternak
ini petak buat biak anak-pinak
ini busut lambang tak goyah digertak
inilah tamadun kita koloni bergerak

biar himpit ditindih sempit
tiada ngadu nak diungkit
satu matlamat biar dibangkit
kemajuan mesti kita lilit
setiap ahli harus tulus
antara tugas harus telus
baru denai nampak lurus
tak mudah terjerumus

pantang alah sojar istana
pantang acah minta dijajah
baik anai atau kerengga
sarang ini tak lut dimamah

maka bonda pikul amanah
zuriat disambung wasiat disanjung
keturunan tiada noktah
hasil jerih melentur rebung

kami kelompok semut
bukan golongan pengikut
setia kami bukan setia pak turut
sembah kami bukan sahut-menyahut
saat bencana datang meribut
pantang sembunyi sebalik rumput
kami tak mudah melalut
menikam belikat sesama semut
sama perlahan menarik rambut
majunya koloni jangan terbantut

Kakaktua Hilang Tuan

tersangkak balung si kakaktua
meraung pecah kaca jendela
kelam-kabut kehilangan tuannya
bagai selampit terpelecok suara

selama bernyawa disuap mesra
diberi beras bertih kelas tiga
sangkar elok yang jenis koka
hambal tidur baldu sutera

sepanjang usia dilayan sempurna
diajar lagu lenggok membelai jiwa
tukil ungkapan nasihat berguna
agar senang dimuntahkan semula

hilang tuan si kakaktua
nak ikut cara siapa
nak tiru si merbuk pula
serak halus macam tak kena

kicau nuri nada berbeza
lain mazhab lain salasilah
kalau dibuntut si pungguk pula
takut bulan jadi marah

kakaktua jadi gelabah
tiada tongkat pandu arah
dicedok budaya penjajah
bikin bunga bau sampah

balung putih diinaikan
konon ikut peredaran
junjung sama kemajuan
ikut tumpang kegemilangan

serak basah dicemikkan
atas dasar perpaduan
loghat lidah riau kemelayuan
tapi bunyinya keinggerisan

memang cara si kakaktua
tiru awok-awok belaka
lihat dengar pasang telinga
tukang karut kata ulang semula

Epilog Si Cacing Tanah

ratusan kaki ini menyusur lubang liang kubur
rangkak tinggal tapak di celah rongga akar subur
selang selinap sama lipan sepanjang umur
kubang pasir tempat tidur dipayung terik zuhur
dan aku menjadi saksi benih bertunas telur
aku si cacing tanah bergelumang dalam lumpur

aku sentiasa di sampingmu oh khalifah dunia
yang sembunyi di balik dua belas macam tanah
dari puncak Tursina jelajah rentas Babylonia
yang mencorak roman jiwa dan paras wajah

dan aku di kala kau kibarkan panji-panji merdeka
hanyir darah lekit-melekat di lantai ibunda
masin peluh meleleh meresap masuk melukis peta
aku mangsa menghirup titis najis dan noda

ratusan kaki ini menjelajah
akarnya hijrah Adam dan Hawa
ratusan kaki ini menjelajah
gunung danau tamadun purba
ratusan kaki ini menjelajah
nenek buyut jadi merdeka
ratusan kaki ini menjelajah
rentas bersama akrab dibina

sini tapak langkahmu bajak
tuai benih tunas berisi
cangkul antan tingkah-tolak
gali hasil peribumi
sini tapak langkahmu pijak
putar pusing tujuh kali
sayang bonda sekali hentak
bercucuran air syurgawi
sini tapak langkahmu pacak
pasang lima tiang seri
batu atas batu diletak
bikin atap payung negeri
sini tapak langkahmu corak
jalan aspal denai berduri
jatuh curam panjat puncak
aku hanya menumpang saksi

dan aku masih menjadi saksi
saat ditimbus digali
aku akan tetap menemani
saat rangka ditinggalkan isi
aku pacal hina hanya memerhati
engkau dengan tanah
ibarat sahabat sejati

Celaka Cerita Jenaka

geli-gelekek tawa terkekek bak digeletak
bila bersua watak-watak aneh lagi pelik
duka bertukar suka, si murung tak merengek
dek si lurus bendul, dek si pintar cerdik

kita kunjung ke kampung Pak Kaduk yang tergadai
dek ditukarkan ayam wiranya Biring Si Kunani
kita menyusul pula dengan tipu-helah Si Luncai
yang akhirnya mati ditikam Puteri Lela Kendi

kita jenguk kenduri Pak Pandir si bodoh keldai
seingatnya kambinglah pak lebai pipitlah tok haji
kita sudahi pula dengan Mat Jenin yang lalai
dikapankan angannya yang belum berbuah lagi

kisah seloka dalam jenaka
terjentik jiwa, tercuit hati
ada yang suka, tersengih leka
kita selami sebalik inti

kita tengok Pak Kaduk, biar ayam jaguh kampung,
tapi tetap kena tunduk, patuh arah pasti junjung
kita tabik akal Luncai, lompat terjun masuk sungai,
tapi bahagia tak sampai, gara-gara jadi pandai

kita menyakat Pak Pandir, sudah bodoh lagi dungu,
habis maki campur sindir, masih tetap kurang ilmu
kita layankan Mat Jenin, asyik dengan angan-angan
inikah usahawan tulen, walau jatuh separuh jalan

biarkan, oh biarkan...

biarkan isteri Pak Kaduk mati dipukul kemarahan
biarkan si Luncai dihukum mati kerana kebenaran
biarkan anak Pak Pandir mati melecur ditertawakan
biarkan angan-angan Mat Jenin mati separuh jalan

biarkan, oh biarkan...

biarkan anak-anak kita berani menempuh cabaran
biarkan mereka tulus mempersoalkan kesilapan
biarkan mereka sesat meredah hutan pengetahuan
dan biarkan mereka berangan tanpa batasan
entah esok lusa jadi kenyataan...

aduhai malang sungguh watak-watak jenaka
cerita penuh luka, penuh celaka, penuh tragedi
mungkin tukang cerita hanya kisahkan yang nyata
biarkan mereka tertawa dengan bayang hidup sendiri
atau mungkin ada pesanan sebalik seloka

Malay Poetry – 1st Prize
Mohammad Farihan Bin Bahron

biarkan mereka mencari dengan akal dan celik hati